



Te storie de scuele, nissun al veve vût un maxima cum laude come lui e ducj a vignivin a fâi lis congratulazions e a invidâlu achí e ai par celebrâ l'avigniment, Cun tantis atenzions, al si sintive come un bocje di chenti il dì de prime comunion o un di venti il dì de circoncision . Altri che un fi di nissun come lui tirâts sù ae dure. ae Oliver Twist sot di Fagin, cun slepis e botis aes falopis e premis cun laude da filius natus nobis hodie.

*Prin invît aes 6 di sere al parc, al leieve i manifescj a pene incolâts:*

*Spettacolo artistico di alto livello.*

*Solo stasera nel Parco delle rose*

*I Zigaines*

*Musica, danze e coreografia coi migliori artisti di Boemia, Romania ed Ungheria.*

*Si consiglia riservare subito.*

Ae fin dal spetacul, cuant che inmò i fruts dai artiscj si cjatavin jenfri le int a fâ i saltarins o i paiassos, al veve tacât a plovi e cul fuifui che al jere nassût, in pôc mancûl di un quart di ore, di int no 'nd ere plui.

Invezit sot dal tendon dal ristorante, di int al jere plen e al so jentrâ si jerin ducj jevâts a bati lis mans.

Balarins, musiciscj, cjantants mestris fufignis che tantis voltis, mâl o ben, al veve frequentât prime di passâ l'esam, a jerin ducj li.

Ce tantis sberlis, pugns e cjastîcs di ogni gjenar vevial vût di incassâ prime di podê saltâ fûr di ai?

Ma vuê a jere fieste grande. Daspò i batimans ai fruts e a chel che al veve vût le idee di meti sù un spetacul par fâ ricetis e tal stes timp lis sachetis, si faseve il bilanç: I canais a vevin robât 34 tacuins e 22 telefonins, lis frutis 48 golainis, braçulets, orlois di ogni aur e nissun al veve cjatât un tuart da daur par ce che no si jere inacuart di nuie.

Ma il eroe dal di, il gnûf re dai sborsarûi al jere lui. Dai canais in sù, ognidun al veve di alçâsi, jevâ il so tai ae so salût zontâ une dediche di circostance e po glùglù fin ae ultime gote.

Finît il zîr, lis lûs si jerin studadis come par fâ un interval e lui che fin dal prin tai a nol capive masse al si domandave ce che i podeve inmò sucedi. Un violin al veve intonât un toc da fâ pene al stes Antonin Dvorak se nol fos che lis ghitaris che i stavin daûr a someavin lâ a spaç cun Django Reinaert e fâ un crescendo par che, al impiâ des lûs, come al vierzi di un sipari, al si cjati devant di lui le biele zovine mieze Lollo e mieze Barbie fie dal capo che tal cidinôr al declarà solenementri alçantsi che si, i deve sô fie da maridâ, ma a i zontave che ancje s'al veve otignût le lauree in te sience dal robâ, vê dome 16 agns no i dave dome vantaçs...

Al ingraciâ il pari-Fagjin jevant il so tai ae so salût e po lu abraçà cu lis lagrimis tai vôi. Ce serade!

Le esplosion di batimans a fo tant spontanie che il gnûf zinar al esitave: Suiâ lis lagrimis o ben...

Po, come s'al jevàs pal aiar le cope dal mont al mostrà il tacuin che al veve a pene robât a so missêr.

Cidinôr di tombe.

Po une grande ridade coletive che fûr dal tendon no someave plui finî.